

Jems

1 ¹I dere aŕeta, Kótóró Tale Yesu Kerisotamoné kutó diratere whi Jems-né dapó. Diā Kótóné ama 12 fake so whiŕapetei torokó faróló, kae kae tiki daae mole so whi kuamó betó mole no nerapepaae kŕeó fo i dere ape.

Sekŕi alané dané tué tiki tiiró betere ala kŕae kolóló sŕ sirapó

²Yaŕlo hosaa mole no nerape-ó, mepaae kae kae sekŕi alarape diapaae wapa, ita e kŕae kelaai dapóló haŕné sukutu betae. ³Ti noatepae, ai wou betere sekŕi alarapenáta, diaaŕ Kótópaae tué tiki tiró betepa kŕae kolóló sŕ ai sere ape. Ai sŕ sere alanéta, diaaŕ du betere wisi ala taaréni, yótóróti tawópóló fotokó bulótu betereitei, diāné ai tuéŕe ape. ⁴Ti atétu betere alanétei, diaaŕ hosaa tuāmó wisi ala mulu, whi wisinaale beteraté fole ala tuāmó tikini, haŕle deté fóló kemene fole kwiamó sókó fópóló yae. Téturaalu, me alakókélé yaŕani, mo turó sŕ yaalo ai ape. ⁵Diākó mepaae so whi detamo Kótóné ala eraairaalu fosó fosói kisipa tiki wisi yaŕatepa, ti mo turó mótu betere Kótópaae wosae. Atétepa, Kótóné wosóló taaréni, a mo hamokore sekŕ betereiteiné diā feamó mo melaalo ai ape. ⁶Téyaalotei, mepaae whiné Kótópaae woseturaalutamo epaae i ala eraalopé neyaalorópó yóló kisipa tamo muni, mo apaaetórti kisipa tiki tiró bitu wosae. Ti atei kae kisipa tamo mutere so whiŕa, beséné wŕi upaae só fua, ipaae só wuatere kaaené kelerapó. ⁷Atei kae kisipa mutere whiné Talepaae kematere ɔla mo betākókélé saalo nisi yaŕse. ⁸Ti ai sekŕné ama kisipa tamo moleteiné, ama dere alarape fea diriyóló bitu ini, haŕle tómó dakeró bitu dua dapó.

⁹ɔla ɔla meiyóló haŕle yoleale betere Keriso nota, doasi doi mulapóló haŕturaalu bopé faketu betae. ¹⁰Aŕa atétu betaalotei, fea ɔla ɔla tare néli whiŕa, doasi doi muni, sókó dei beteraóló bopé faketu betae. Ti noatepae, néli whiné ama dere alata, kale haŕle yó mole ne fua hapale dulukó fu dere kae yaalo ai ape. ¹¹Atétere kae dirii suka duraalu, suka supuné ere ɔla sóku botó yóló dulukó durupuraalu, ama ere au kelené kelaalo kokó yaŕletei dotua dapó. Atétere kae, néli whiné ama du betere ala deté fu betepatei, alu deté fu betaalo ape.

¹²Whi me de apaae doakale sekēi ala wapatei, haepaae derepēni, beléetóro tare whiṭa, Kótóné wisiró betereteiné haíné sukutu beterapó. Ti noatepae, ai sekēi alané kaae kelaai sū siré fu beteró kemene folepaaekélé haepaae derepēni, diriyóló daapa, ti atétere whi sururu yóló fu folosóro sókó fole whiné topo tao su dere kaae, mo ti betere bete saalo ai ape. Ti ai betere beteta, Kótóné apaae yaala sókó fole so whimó melaalopóló, taketi ere qlapó.

¹³Me dowi ala yópóló sū seremó me whiné duraalu, ita epaae Kótónétei eratapó fo ekesé. Ti noatepae, Kótó a dowi ala yópóló, me alané sū seni yóo, amakélé me whi dowi ala yópóló sū sóo, dumipó. ¹⁴Tétumitei, hupu dópóló he tēnóló ama ekēleyóló nokole qla he dolomó mulótu dere kaae, da so whi dokō feané hosaa tuamó mutere kisipanétei dowi ala yaai ekēleyóló, au nuku beterapó. ¹⁵Atéro au nóló kisipa sere alané sorape naale derótu dere kaae dowi ala kaaratapó. Atéro naale yóló ulumétepa ditu dere kaae, ti kale dowi ala foparóló haḱeamó depa kilitua dapó. Atéro kale naale doayóló mo doasi whi bitu dere kaaeta, dowi ala faketuraalu sukutere ala kaaratapó.

¹⁶Yalo hosaa mole ne norape-ó, mené kapala fonétei diḱ dilikaosóro yae. ¹⁷Daḱé Aya a ó hepen bemó ere de wisinaale tuamó bituraalu, da i haemó betere so whipaae wisi alaró wisi qlatamo betere dokō fea mo turó mótua dapó. Ai sekēné ama dere alata, whi sukamó daatepa aso haḱeketu, fqlotu dere kaae dumipó. Betere dokō fea ama erótu betere alata, mo betā kaae alatóróti eró tarapó. ¹⁸Daḱé kale mo fo wisi woseté fu betereteiné, ama naale senaale beteraai dapóló, amatei da sóro beteralepó. Taketi Talené ama kaaróló muló betere qla fea yó mupatei, daṭa folosóro doasi topo qla beterópólópó yóló kisipa mutu, deyóló beteralepó. Atéreteiné daṭa mo ama so whiṭóro beterapó.

Dere fo wosóló taaréni, sya fae

¹⁹Yalo hosaa mole no nerape-ó, i dere fo mo wisiyóló wosóló tué muea. Diḱ feané kale fo wisi woseturaalu, deka ini, ketekē buóló mo wisiyóló wosae. Mepaae fo yaairaalu, hapale hōko ini, mo dua tué tekeyóló yóo, me whiné ya fopaae buópóló sesemeratere fo depakélé, kisipa tekeyóló me qla meipóló mo dua betóo, yae. ²⁰Ti noatepae, mo whiné atéro fopaae butere alané Kótóné ama mo donoi naale senaale beteranée yóló mole kisipa eranénipó. ²¹Térapa, Kótóné keletómó mo kelaalo sonaalei dowi alaró i hae kwiamó mole kae kae dowi alatamo momó kae ini, mo ti taaróló kisipa keterae. Atéturaalu Kótóné fota, da aluyaosóro tao saaire fopa, qla wae hae wisimó bitu dere kaae, nao tiki tuapaae derepópóló mo ketekē buóló sae.

²²Kale fo haḱe woséliné maaté wosóló taalatepa, ti naaotei kapala ya ai dilikitu betere ape. Ai ala ini, ama yapaae erae du betere fotóróti mo

eró tawae. ²³Mepaae wh̄i dené Kótóné fo wosóta deretei, ama yae dere ala mopóló erénitepata, ti etei ala dere kaaepó. Wh̄i betāné ama kelepaa *klas*-mó fopeyóló, ą faaire tikipaae fulapó. ²⁴Atéro furaalu, ama kelepaa etei daapa kelalepóló kisipa yó tani, mo hapale téti keterótua dapó. ²⁵Téretei, Kótóné ama tukóló muló betere fo dokonaletéiné so wh̄i dokóló moletei hałe fǫpóló erótu beterapó. Mepaae wh̄i dené ai fo wosóló kisipa keteréni kutirimó mulóló eraté fu betepa, ti até dere wh̄iné ama du betere ala tuāmó Kótóné ą wisiraalopó.

²⁶Téretei, mepaae wh̄i denétamo ą Kótóné ala erótu betere wh̄ipó du bitutei, ama dere fo fea wisiyóló tuę tekeyóló ini, dowi fotamo dekaaporóló du betepa, ti ama ai dere fonétei ą dilikóló, Kótóné ala erótu betereteikélé mo hałe ąla kaae aleratapó. ²⁷Dāné Aya Kótóné keletómó so wh̄iné Talené ala eróturaalu, kae kae alatamo hosekényi, mo donoi alata, i ape. Bokonaale naale senaaleró wulia sorapetamo sekę yaşsóró tao sóo, depa, ti Kótóné ama mo donorapóló kisipa muaalopó.

**Doi mole wh̄i wisiyóló dape suraalu, doi
munire so wh̄i sisópaae eraşse ere fo**

2 ¹Yało no nerape-ó, dą tǫteróló kaae tare Tale Yesu Kerisota, Kótóné ama kae ere dę wisi naale ą tuāmó fāanapó. Atéro betepa dą ąpaae tuę tiki tiróló betere so wh̄iné, mepaae doasi doi mole wh̄irape dape suraalu, mepaae sókótei betere so wh̄irape wisiyóló dape sinitere ala yaşse. ²⁻⁴Atéturaalu, dią betāpaae touratere sukamó *kold kapané* aleyale bi naasemó bulóló kutikélé kelaalo kokǫi deróló wale wh̄i wisiyóló dape sóró ni fake wisimó beteróo, dowi derąakele kuti deróló wale yoleale wh̄imo tumó daayae ó ę betere aǫ keya tómó hǫko betae yóo, dere-a dią Talere kaae kele fosóru, tale du bitute? Diaaǫ atétere alanétei dowi kisipa mutu me wh̄i só deratere wh̄i sų ai betere ape.

⁵Yało hosaa mole no nerape-ó, i dere fo mo wisiyóló wosae. I haemó betó mole so wh̄irapené duraalu, ai wh̄irapeta, me ąlakélé meiyóló mo yoleale yóló beterapó dua dapó. Tépatei, ai wh̄i kisipa tiki tiratere ala mo turó yǫpóló Kótóné amatei sorokó su yóló kae beteró beterapó. Atéru, Kótópaae yaala sókó fu betere so wh̄irapené ti Kótóné tǫteróló betere ala sǫpólópó yóló muló betere fo dokonóturaalu, take atimané mo saalopó. ⁶Tépatei, diaaǫ yale alané atima yoleale yóló betere wh̄irape hale seróló só ai derale ape. Kale doasi *moni* tare néli wh̄irapené noa alamaaté diāpaae erótua déró, diaaǫtei tuę tekeyae. Dią dilikóló diaaǫ tare ąla sua yóo, diātamo fo tokótamo yóló só derótua yóo dere-a, némaaté dua de?

⁷Ai wh̄irapeta, diaaǫ tikimó muló betere Talené doi wisinaale dorótu betere ape.

⁸Dą tǫteróló kaae tare Tale doasi wh̄iné aşemó yae yóló muló betere fo wisinaale i ape. Naaotei ya yaala sókó fu dere kaae, mepaae so

whiṗaaekélé atéro yaala sókó fu betae. Atétu betepata, ti mo wisi ala ai du betere ape. ⁹Tétu bitutei, me whiṗmo wisiyóló dape sóró wisi ala eróo, me whiṗmo wisiyóló dape sini yóo depata, ti kale yóló muló betere fo tukóló dowi ala ai dere ape. Atéturaalu, ai kale yóló muló betere fonétei ya só deró beteraṗó. ¹⁰Ti noatepae, Kótóné yae yóló muló betere fo fea mo wisiyóló sya fóló erótu bitutei, betṗ alakó ḥasókó fóló depata, ti Kótóné yae yóló muló betere forape turó ai tikire ape. ¹¹Ti noatepae, fo yóló mulóturaalu, so ḡlémi naṗse dere sekḗnétei whiṗ daṗse fokélé tukóló muló beteraṗó. Mepaae whiṗné so ḡlémi nokole ala ini, whiṗ dele alamaaté depa, ti ai whiṗta kale yóló muló betere fo tikitu betere whiṗ ai betere ape.

¹²Mepaae whiṗnétaṗo i yae yóló tukóló muló betere fo sya fóló erótu betepa, ti ai whiṗ me dowi alané só deréni, wisi kisipa betṗ muóló ḥṗle fṗpóló eraalo ai ape. Atéro ḥṗle fṗpóló eratere alané take waaire sukamó doasiné yóló muló betere fo kolósu ḡṗné du betale alaró du betale fotamo kolósu yóló taleyaalopó. Téyaalopa, diaaṗ dere foró du betere alatamo hotowayóló kaae taru, kisipa tekeyóló du betae. ¹³Ti noa yaṗsóró meipó. Mepaae whiṗné me whiṗ ḡṗletere alakélé ini, dupumaaté saalopó du betepa, take doa Talené taletere sukamó ṗpaae ḡṗletere alakélé ini, ama yale dowi alamó kwia tokṗ mótu mo donotóro melaalo ai ape. Téyaalotei, mepaae whiṗ dené me whiṗ ḡṗlené sukuturaalu me ḡla meipóló taalatepata, ti ama yale dowi alamó dupu melaai yaletai, teṗteróló aluraalo ai ape.

Tuḡ tiki tiratere ala sya fóló mo erae

¹⁴Yaḡo norape-ó, whiṗ betṗné duraalutamo ṗta Kótópaee tuḡ tiki tiró beteraṗó du bitutei, ama me wisi alakó initepa, ti ama ai du betere ala wisirapóló tuḡ mute? Atei kaae tuḡ tiki tiratere alané ṗ aluyaṗsóró ṗmó tao senénipó. ¹⁵⁻¹⁶Motamo mepaae no ó nené ama deraaire kutiró naaire ḡlatamo meipa kilirutei, diṗkó betṗ whiṗné ṗpaae duraalu, “Yaḡo mo wisiyóló fóló ḡla nóló, noke fitukélé wisiyóló fiyae,” fo dutei, ama yaṗṗare ḡlarape tao sóró menénitepata, ti naao ai dere ala fea wisirapóló kisipa mute? ¹⁷Atéraṗa, naao mo dere alakélé tuḡ tiki tiratere alatamo ṗṗrópóló dekaaporóló ini, tuḡ tiki tiró betere alamaaté epa, ti ai tuḡ tiki tiró betere ala sukóló mo ḥṗle ḡla kaaené kelerapó.

¹⁸Téraṗa, whiṗ mené etei kaae fo yaalo ai ape. “Naao du yaḡ Kótópaee tuḡ tiki tiró beteraṗó fota ai dapa, yaḡokélé wisi ala erótu betereitei kṗae kelaai ḡamo i ala yaalopó. Wisi ala mekókélé initutei, naao tuḡ tiki tiró betere ala kelaalopa, ḡpaae yó ṗlae. Yaḡokélé Kótópaee tuḡ tiki tiratere ala naao kelaasepóló, wisi ala eróturaalu yaṗpaae yó melaalopó,” fo enéraṗó. ¹⁹Mo betṗ Kótótóroti beteraṗóló, naao tuḡ tiki tiró betereiteita, ti wisirapó. Kale dowi keperapénékélé Kótó mo beteraṗó kisipa muturaalu, wiṗyóló diri furu furu ai du betere ape.

²⁰Kisipa tiki okoko yóló betere whiṗrape-ó, diaaṗ me wisi alakó inituraalutei tuḡ tiki tiratere alamaaté epata, bete muni mo ḥṗle ḡla

kaaené kelepa diriyóló tué muópóló, yało me noa alakó yó melaaloé?
 21 Đané noutere Abraham-né yale ala tué mueae. Ama naale Aisak Talepaae hałe melaairaału, Kótópaae hałe matere ọla sukulaa dalaai aleyóló muló betere kane fake tómó beleralepó. Atépa Kótóné kólóló, “Aťa, mo donoi whípó,” erapó. 22 Ti ama kisipa tiki tiróló betere alaró du betale alatamo touróturaalu yale ala kólóló kisipa mueae. Ama yale alanétei Kótópaae tué tiki tirale ala mo turó eralepó. 23 Até yaleteita, ašemó yóló muló betere fo mo dokonóturaalu erapó. Abraham-né Kótóné dere fo wosóló tué tiki tiró betepa, Kótóné kolóló i whĩata, mo donoi whípó, fo yóló mulalepó. A ą atéro betere ala kilituraalu, i whĩata Kótóné mo ama hosaa mole fulumu whi ai betere ape dua yalepó. 24 Ti ai yale ala tué mueae. Kótóné mepaae whinė tué tiki tiró betere alamaaté kolóló, i whĩata mo donoyóló fole whípó fo dumi, kale whinė dere alakélé kolóló i whĩata, mo donoyóló fole whípó du beterapó.

25 Até yale kaae, kale nópu nuku betale so Rahab-né kale bóe sa fele whĩrape ama bepaae dape sóró firóló, ai kale be hulua whinė atima daşsóró kae turó fópóló dotęyale ala Kótóné kolóló i sota, mo donoyóló fole sopó yóló mulalepó. 26 Atérené sukune whi tuámó kepe bete bitinire kaae, Kótópaae kisipa tiki tiróló bitutei, wisi ala initepa, ti ai kale sukune whi aęrapó.

Hape mo hotowaró tęteróló kaae tawae

3 1 Yało norape-ó, diąkó me whi Kótóné fo yó matere ala wisiyóló kisipa inirutei, da fea fo yó matere whípóló hałe hoko yó mótu betaęse. Ti noatepae, Talené fo yó matere whĩrape daťa, mepaae fo haşókó fóló yó melótu beteremó, nalo ama taleturaalu mo doa kwia melaairetei diaaę ai kisipare ape. 2 Da fea kae kae haşókó fole alané dée nalatua dapó. Me whinė ama dere forape haşókó fóló dée nanénitepa, ti a me alakélé ini, mo whi wisinaale bitu, ama betere bete turó amatei wisiyóló kaae tanérapó.

3 Atéruraalu, kale *hos* hupu da whinė faai kisipa mutere tikipaae fópóló *hos* hupuné ama hape tęteraaire dirii ọla kólómó hamunótua dapó. Ai hamunale ọlanétei, whinė kisipa mutere tikipaae fópóló, ama tiki turó donorótua dapó. 4 Meta i ape. Kale mo doakale węi kęlamó kotere doasi nuku tué mueae. Ti ai nukuta doasi ọla muóo, ama fole alakélé beşę tiki fotokęnétei falóo depatei, kale nuku só kotere whinė ama faai fole tikipaae fópóló, mo sawatamo néli fetetepa kutua dapó. 5 Atéru ere kaae, whinė tiki tuámó daale hapeta sawatamo ọlatei, bopé fake duraalu ęta doasi ọlapó dua dapó. Mo sawatamo si kelenétei kaaróló doakale si fakeyóló dukuraalu, ọla ọla fea kuló dokoletui tué mueae. 6 Atétere kaae, da whi tiki tuámó kae kae ọlarape daaletei đané hape betąta, mo si kaaetóróti dukuraalu, kae kae dowi ala kaarótu betere ọlapó. Kale wuliné

api fulukó furaalu, naaitere mi dorótu dere kaae, hapenétei dané tiki turó dorótua dapó. Kale sawa si kelenétei fakeyóló doasi si duku dere kaae, hapené whinė betere bete turó dorótu beterapó. Ai hapemó dokole si-a momó deyaaleé? Mo apaae derepale dolomó dó tare dowi simó ai deyaale ape.

⁷Fea kae kae betó mole na, hupu, wuli, kou, ó ba, doa wēi kēla tuamó betó mole olakélé feata, whinė whaayóló bérótua yóo, mió i alimókélé whaayóló béroo du beterapó. ⁸Téteretei, hape betāta whinė dere fo wosóló aqmó beterópóló mené béránénipó. Ti hapeta, dowi ala yaai ketekē bulu, whi dóló sukunaterere herei kaae buóló fañuraalu, ama yaaitere ala taaréni haē yótóro tarapó.

⁹Ti dané kqlómó sókó wale fonétei, da tēteróló kaae tare Taleró Alimatamoné doi hale sóro horótu bitutei, Kótóné ama aso suróló aleyale so whikélé foné só deróló dorótu beterapó. ¹⁰Betā kqlómótei Talené doi sóro horaterere fo yóo, whi fale yóló doi doraterere fo yóo, ai du betere ape. Yaño norapé-ó, aita mo enei ala meitei, diaaḡ ai du beterapa taalae. ¹¹Betā wēi amalemótei, wisi weiró dowi atukū weitamó wale? ¹²Yaño norape-ó, nose tikimó *Olip* du ó kae ni du oleyaaloé? *Wain* kēpimó nose du oletua de? Meipó. Dowi atukūtamo wale wēi amalemó wisi wēi sókó wómipó.

Haemó mole fosó fosói kisiparó Tale betemó wale fosó fosói kisipatamó

¹³Diakó mé whi Kótóné bete mole fo mo wisiyóló tuē muluraalu, ama kiswa mole ala eraai fosó fosóere? Atéro mole kiswa wisi, so whi feané kolópóló wisi alarape haḡeamó erótu betae. Téturaalu, Kótóné tuē wisi tuamó kaaróló sókó wale mo dua hemée deyóló bitu du betere wisi alané ai fosó fosóre ala haḡearatapó. ¹⁴Tépatei, diaaḡ hosaa tuamó dei kiswa muóló alale suraalu, ekélé u whi kaae doasi betaai dapó kiswa mutepa, ai wisi ala nisiyóló bopé fake yaḡse. Atétu betereiteiné kale mo bete mole fo kapala nisiyóló faletu beterapó. ¹⁵Atei kaae fosó fosói kiswa mutereiteita, ó hepen bemó kaayóló dorowómitei, i haemó betere dowi keperapené mulaterere kiswa ai ape. Ti ai kwapata, Deḡ Kepe Wisiné kaaréni, i haemó mo whiné kaaraterere kwapapó. ¹⁶Ti noatepae, etóro doasi topo whi betaaitapóló, ama yaaitere alamaaté kiswa muóló alale su betere tuamó haē hoḡo alarape duraalu, kae kae dowi alarape sókó wapa kelaalo ai ape.

¹⁷Téteretei, hepen bemó kaayóló dorowou betere fosó fosói kiswa tikiné dere alata etérópó. Me kwapatamo hosekēni mo betā alatóróti yó tare alata, mo folosóro bete mole ala ai ape. Ai alané sisópaae fopaae fokélé ini, mo dua betere ala yóo, mepaae whiné tuē tiki sekē yaḡsóró tuē tekeyóló dua du betere ala yóo, doasiné dere fo wosóló aqmó sukóló dua betere ala yóo, kqlené sukóló wisi alamaaté eraterere ala yóo,

mepaae doa doi mole wh̄irapepaae eratere ala kaae, h̄oko sókó dei betó mole so wh̄ipaaekélé bet̄a alatóróti eróo dere alata, me kapala fotamo dekaaporóló ini, mo fotóróti buluraalu dua dapó. ¹⁸H̄ole sere ala taaróló, mo dua betaalopó yóló h̄ole filitere wh̄irapeta, hosaa muni deóló mo dua betere ala tūamó bitu, kutómó ɔla wae wisi bilitu dere kaae du beterapó. Atéró ɔla ɔlumétepa su dere kaae, so wh̄i feaná me alakélé muni, mo donoi alatóró yaalo ai ape.

Kótóné t̄eteróló kaae tare aɔmó dua betae

4 ¹Dīa tūamó fopaae buturaalu, h̄ole sere alaró huri dere alatamo-a, noa betené kaarótu betere? Aita h̄ale kaani, kae kae alakó enée yóló ek̄ele du betere alanétei diaaɔ tūé tiki tūamó bóe dolótu betepa, h̄ole sere alaró huri dere alatamo ai du betere ape. ²Diaaɔ mepaae ɔlakó senée yóló kisipa mutu betepatei sini yóo, dīané au nóló wh̄i du bitutei diaaɔ kisipané senée dere ɔla mo sini yóo, dīa huri yóló fopaae buturaalu h̄ole su betóo, du beterapó. Diaaɔ kisipa mutere ɔla saaitapóló Kótópaae wosenitereiteiné ai senée dere ɔla sumipó. ³Diaaɔ Kótópaae me ɔlakó ɔlae yóló wosetu betepatei, ai ɔla sumipó. Ti noatepae, dīané ek̄ele yóló senée du betere ɔla saairaalu ɔpaae wosetu betepa ama matepa sórómo, diaaɔ ek̄elere ala yaai mole kisipa ama kilitu mótumipó.

⁴Dīa i haemó kae kae du betere alatamo nópu nuku betere so wh̄irape-ó, i haemó du betere alatamo fulumu du betere betené Kótó h̄óróló bóe du beteretei diaaɔ kisipanié? Mepaae wh̄i de i haemó mole alatamo fulumu kisipa mutupa, ti Kótóné bóe wh̄i ai alée fole ape. ⁵Kótóné asēmó yóló muló betere fo i ape. Dā tūamó betere Dēi Kepe Wisiné dā Kótóné ama dokore sopa, wh̄i me kaetamo fulumu ini, ɔtamotóró fulumu yóló beterópoló doasi ketekeɔ butu beterapó, ere fo-a bete munipa h̄ale asēyaleé? ⁶Téretei, Talené dā ama h̄ale hamokoróló tao su betere tómó beleróló miókélé h̄ale tao suatóró yó tarapó. Atétere betené i fo asēyóló muló beterapó.

“Bopé fake du betere so wh̄i atima yaai dere ala yaqsóro Kótóné sesé yóo, haemó sókó deyóló betere so wh̄i ti ama h̄ale hamokoróló tao sóo, du beterapó,” erapó.

⁷Kótóné ama dīapaae eraai kisipa mutere ala erópoló, ama t̄eteróló betere aɔmó sukóló mo dua betae. Dowi ala yópoló dée nalatere topo daale kepené dīa dée nópoló s̄u sere ala ai du betepa, sesétu betae. Atétepata, ti dīa taaróló ɔ botokó faalo ai ape. ⁸Atéró dīa Kótó betere felekepaae bit̄i wapa, ti ɔkélé dīa betere felekepaae wóló betaalopó. Dīa dowi ala du betere so wh̄i-ó, diaaɔ bólure naase wisiyóló fukutu betae. Tūé tiki dekaaporóló betó mole so wh̄i-ó, dīané mutere dowi kisipa taaróló, wisi kisipa bet̄a diaaɔ hosaa tūamó muóló betó muae. ⁹Atéró, diaaɔ du betere dowi alamó kisipa mutu, dekené sukóló moló yóló wole

du betae. Dią hękeseturaalu dọ nokole ala taaróló, fomaake kisipa mutu dekené sukutu moló du betae. ¹⁰Atéturaalu, Talené keletómó diaaętei mo dua sókó deyóló betepa, ti amatei dią sóró horaalo ai ape.

¹¹Norape-ó diąsisitei eratere fo yaęse. Whị me denétamo ama no só deratere fo ó eratere fo depata, ti Kótóné yae yóló tukóló muló betere fotei, faleturaalu taleyóló só deratapó. Ti diaaę atéro kale tukóló muló betere fo taletu betepata, ti atétere sukamó dią ai fo aęmó sukóló bitini, ai fotei tęteróló taleyóló só derótu beterapó. ¹²I ala yae u ala yaęse yóló tukóló muló betere fo bete Tale mo betątóróti bituraalu, so whị feané yale ala fea amatei taleyóló kwia melaalo ai ape. Ai sekéné amatei so whị aluyaęsóró tao sere ala yóo, mo ti doratere alakélé eróo enérápó. Téyaalopa, naao be whị so whị taleyóló só derótu betere fo-a, ya Tale kaae bituraalu du bitu de?

Bopé faketuraalu, nalopaae i ala yaalopóló foné haęe họko yaęse

¹³Térapa, i dere fo mo wisiyóló wosae. Dią mepaae whịrapené etei kaae fo dua dapó. Mió ó dó dą me doasi be huluapaae fóló bituraalu, *moni* saai kae kae kutórape ditu betepa, ba fo betą kemeraalopó dua dapó. ¹⁴Ti diaaę dó yaaire ala tuę inirutei du beterapó. Diąné betere beteta, noa ala kaaené kelere? Hịka epo mupa suka sókó huturaalu, epo hapale turukó falótu dere kaae, diąné betere betekélé ai ala erapó. ¹⁵Ti ai yaalopó dere fo taaróló, i fo depa wisirapó. Talené ama kisipa mole alapata, ti dą bitiré furaalu, ai ala mo yaalo ai ape. ¹⁶Ti diaaę atei ala yaalopó du betere fota, dią bopé fake duraalu dapó. Atéro du betere fo feata, ti dowi alapó. ¹⁷Térapa, mepaae whịné eranére wisi ala mupatei erénitepa, ti aita dowi ala ai ape.

Néli whịné mepaae yolealere whịrape sekei ala eraęse ere fo

5 ¹Atérapa, dią doasi wisi wisi ęla tare néli so whịrape-ó, diaaę i dere fo wosae. Diąpaae waaire sekei alamó kisipa muturaalu, wole yóló moló du betae. ²Diąné tare wisi wisi néli ęlarape fea kęlaa yóló, kutikélé ero siné turukóló mo ti ai doró betere ape. ³Diąné tare, *kold kaparó silpa kapatamokélé* hoti dakóló ai do yale ape. Take taletere sukamó kale hotinétei dią só deróturaalu, diaaę tiki mi mo siné kaae dukulé fu beteró kemeraalopó. Até yaaireteita, diaaę wisi wisi néli ęlarape ukusituraalu, betąpaae yóló muté hutu betaletinépó. Atéyaaire be dę teópatei, mió kaae sóró seke ai su betere ape. ⁴Diaaę kutórapemó yó mole ęla ęlumétepa siré kotere whịrapené saaire *moni* turó meni, mepaae kwia diaaę kemei dekée sale *moninétei* dią só deróturaalu, fo fake yóló ai du beterapa wosae! Ai kutómó ęla siré kotere whịrape atimané dupu sụnipóló dere fo Talené ama mo wosetu beterapó. ⁵Dią i haemó bitiré wale sukamó wisi wisi ęlarape diąmaaté ekęleyóló nukulé ai fu betale

ape. Até deté fu betaletiné, daaire hupu whaaturaalu, seraayópóló ɔla wisiyóló mótu dere kaae, diaaɔ du betale alanétei diaaɔ tiki ai botokorótu betale ape. ⁶Atéturaalu, diɔ néli whjrapené me dowi ala inire whjrapetei, diaaɔ só deróló du betalepó. Diaaɔ atétepa, atima sesé yaairekéle mo sunipó.

Sekeji ala eratepa haepaae derepéni, haɔe belée tawae

⁷Yaɔlo norape-ó, Tale waaire be de teópa, mo dua bitu kaae taté fu betae. Kutó ditere whjné kutómó ɔla wae biliyóló sukaró halitamo wópóló kaae taruraalu, ama ke kutómó ɔla wisi saai kisipa mutu, kaae tawóló betere ala kisipa muae. ⁸Atétu dere kaae, Tale mo felekemó waalopa, diɔkéle mo hotowayóló kaae taruraalu diriyóló betae. ⁹Norape-ó, diaaɔ mepaaené dere fo wosetere hóturaalu, no hamoma dokó dokó yaose. Diaaɔtamo ai ala depa, ti fo tokótamo yóló diɔkéle só deraalo ai ape. Atéro tale dere sekeji, ti mo felekemó sókó waai tu serekemó ai daale ape.

¹⁰Norape-ó, take betale Kótóné kóló whjrapené Talené fo erótu beteremó doasi sekeji wapa me ɔla meipóló beleté fu bitipakalepó. Atérapa mió diappaekéle sekeji ala wapa, atimané yale ala kaaetóro sya fóló yae. ¹¹Take betale whjrapepaae sekeji ala wou betepa, faleyóló bitu Kótóné erae dere ala yó taté fu betale whjrape atimané yale ala kisipa mutu, da mió betere so whjné atima doi hale sóro horóturaalu, Talené tao sóro wisiró betere whjrapépó du beterapó. Kale whj Job-paae kae kae sekeji ala wapatei, faleyóló bitiré fóló nalo kemene folepaae Talené apaae erale ala diaaɔ ai kisipa ere ape. Tale aɔta, kolené sukuturaalu, da so whj tao sere ala mo turó faɔnapó.

¹²Norape-ó, ó hepen bemó betere Talené doi yóló ó i haemó ere ala doi yóló ó mepaae ɔla ɔlarape doi yóló diɔné dere fo diriróturaalu malo momókó yaose. Diɔné motóro yaaitepata, ti épó, yaalopó fotóróti yae. Motamo meipó duraalu, ti mo meipótóro yae. Ténitamo, naao yale fo fotokoróturaalu, kae kae fotamo dekaaporóló depata, ti ai yale fomó Kótóné ya só deraalopó.

Tuɔe tiki tiróló dere moma

¹³Diɔkó mepaae whj detamo me sekeji alané só deraai depata, ti ai whjné Talepaae moma yópóló yae. Mepaae whj detamo haɔné sukutu betepata, ti ai whjné Talené doi hale sóro horatere wole forape du beterópóló yae. ¹⁴Diɔkó mepaae whjtamó hepo daae mupa, ti amatei kale Keriso so whj tetéroló kaae tanópóló sóro beteró betere whjrapepaae momarale wópóló yae. Atima wóló a boperóló daalu, ama tikimó Talené doimó wel weji dilóló moma erópóló yae. ¹⁵Ti atima Talepaae tuɔe tiki tiró bitu momatepa, ai whjné hepo mo wisi yaalopó. Atéturaalu Talené a

kepaaraalopó. Ai wh̄inetamo me dowi alakó ipata, Talené ama yale dowi ala kwia me ɣla meipóló hāle kemeraalopó. ¹⁶Atérapa, diaaɣ hepo bete wisirópóló, diɣné du betere dowi ala diɣsisitei u yó mótu i yó mótu yóló, momatere alakélé u erɣle i erɣle du betae. Mo donoi alamaaté du betere wh̄iné dere momata, fotokɣ boleteiné hāsóko feni, dokonótu mo eraalo ai ape.

¹⁷Ti Ilaija ākélé dā kaae mo wh̄i bitutei, atima betere haepaae hali waɣsóro ketekɣ buóló momatóro yó tawalepó. Atétu betaleteiné, ba fo sore kemeyóló doɣ ba fo tuamó halikélé ani, hāle bitiré fipa kalepó.

¹⁸Atéro bitiré fóló, momómo hali wópóló momayalemó, hepen bemó betere Kótóné hali momó anóló, atima betere haemó ere ɣla ɣla sokipakalepó.

¹⁹⁻²⁰Yālo norape-ó, diɣkó wh̄i betɣ kale mo fo wisi taaróló kópaae fupa, mené ā momó dapesó wapa i dere fo kisipa muae.

Mepaae wh̄iné atétere wh̄ipaae no-ó, yāta kɣ tɣpaae ai fulapa, tɣ wisi i mole ape yóló yó matepata, ti atétere wh̄iné ama noma dowi alané mo ti alutere tikipaae faɣsóro tao sóo, mo dekeró yó tare dowi alakélé mo ti aluróo, yaalo ai ape.